

**ՄԵԿՆԱՐԿԵՑ 2007 ԹՎԱԿԱՆԻ «Ն.Ս.Օ.Տ.Տ. ԳԱՐԵԳԻՆ Բ.
ԿԱՌՈՒՑԵՆՔ ՀԱՎԱՏՈՎ» ՏՆԱՇԻՆԱԿԱՆ ԾՐԱԳԻՐԸ
ԵՎ Ս 37 ՏՆԵՐ՝ ԱՆԱՊԱՀՈՎ ԸՆՏԱՆԻՔՆԵՐԻՆ**

Ապրիլի 10-ին Մայր Աթոռ Սուրբ Էջմիածնում, Գևորգյան Հոգևոր Ճեմարանի դահլիճում, բարձր նախագահությամբ Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի, տեղի ունեցավ 2007 թվականի «Ն.Ս.Օ.Տ.Տ. Գարեգին Բ. Կառուցենք հավատով» շինարարական ծրագրի բացման արարողությունը:

2006 թ. ապրիլի 20-ին Հայաստանյայց Առաքելական Սուրբ Եկեղեցու և «Միջազգային Հաբիթաթ» քրիստոնեական բարեգործական կազմակերպության միջև ստորագրված համագործակցության համաձայնագրի արդյունքում սկիզբ առավ Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի անվան «Կառուցենք հավատով» ծրագիրը, որի շրջանակներում «Հայկական Հաբիթաթը» երեք տարիների ընթացքում յուրաքանչյուր տարի կկառուցի 37 տներ Հայաստանի տարբեր մարզերում տնագուրկ և կարիքավոր ընտանիքների համար: Անցյալ տարի Մայր Աթոռ Սուրբ Էջմիածնի և աշխարհասփյուռ հայոց թեմերի թվի համեմատ արդեն կառուցվել և շահագործման են հանձնվել երեսունյոթ բնակարաններ, որոնց վերանորոգման աշխատանքներին մասնակցել են միջազգային կամավորներ, ինչպես նաև Հայաստանյայց Առաքելական Սուրբ Եկեղեցու թեմերի ներկայացուցիչներ և Մայր Աթոռի միաբաններ:

Արարողությունը բացվեց Տերունական աղոթքով, ապա ներկայացվեց Հաբիթաթի գործունեության, Հայաստանյայց Առաքելական Սուրբ Եկեղեցու հետ համագործակցության և «Կառուցենք հավատով» ծրագրերը: «Հայկական Հաբիթաթի» անունից Նորին Սրբությանն աջակցության համար խորին երախտագիտություն հայտնեց խորհրդի նախագահ Վարդան Թովմասյանը: Տիար Թովմասյանը նաև շնորհակալություն հայտնեց «Միջազգային Հաբիթաթի» Տնօրենների Խորհրդի անդամ Գերաշնորհ Տ. Վիգեն արքեպիսկոպոս Այքազյանին՝ «Հայկական Հաբիթաթի» զարգացման գործում բերած կարևոր ներդրման համար, ինչպես նաև Հաբիթաթի տեղացի գործընկերներին, միջազգային աջակից կազմակերպություններին և կամավորներին:

Շնորհակալական խոսքով հանդես եկավ նաև Խոր Վիրապ գյուղի համայնքապետ Նորիկ Ոսկանյանը՝ կարևոր նկատելով Հաբիթաթի գործունեությունը՝ անապահով և երիտասարդ ընտանիքներին օգտակարություն բերելու գործում և նշելով, որ ծրագրի շրջանակում այս տարի գյուղի վեց ընտանիքներ կունենան նոր և հարմարավետ բնակարաններ:

«Հայկական Հաբիթաթի» հայաստանյան հովանավորներից Վիվա Սելլի շնորհիվ տնաշինական ծրագրի շրջանակներում տասն ընտանիքներ կապահովվեն նոր բնակարաններով: Կազմակերպության գործադիր տնօրեն Ռալֆ Հիրիկյանն իր խոսքում նշեց, որ կազմակերպությունը, հիմնված լինելով հայորդիների կողմից, հավատում է Հայաստանին՝ ասելով. «Մենք խաչքարի զավակներ ենք, դարերից ի վեր մենք հավատ ենք ունեցել և հավատ ունենք Հայաստանի հանդեպ..., և այս պատճառով մասնակցում ենք այս ծրագրին»:

«Վեհափառ Հայրապետը եղել է այն ուժը, որ մեզ քաջալերել է այս ծրագրի իրականացման գործում: Եկեղեցու առաքելությունն է մարդկանց օգնելը», - ասաց Տ. Վիգեն արքեպիսկոպոս Այքազյանը՝ «Միջազգային Հաբիթաթի» և «Հայկական Հաբիթաթի» պաշտոնեության անունից շնորհակալություն հայտնելով Նորին Սրբությանը՝

անձնական գործուն աջակցության համար Հաբիթաթի գործունեությանը: «Այս ծրագիրը վկայում է, որ բարեսիրությունը կա և մնում է մեր Եկեղեցու գործունեության հիմնաքարերից մեկը», - նշեց ՀՀ նախագահի խորհրդական Սերգո Երիցյանը՝ ՀՀ նախագահի անունից գնահատանքով անդրադառնալով տնաշինական ծրագրի անհրաժեշտությանը և կարևորելով ծրագրի շարունակությունն ու ընդլայնումը:

Ծրագրի բացման արարողությունը եզրափակվեց Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի օրհնության խոսքով: «Ողջունում ենք ամենքիդ Քրիստոսի Հրաշափառ Հարության սուրբ ավետիսով և բերում ենք ձեզ Մեր բարեմաղթանքները, օրհնությունն ու գնահատանքը, որ սիրով ու նախանձախնդրությամբ փարված էք աստվածահաճո այս գործին՝ կարիքավորին նեցուկ լինելու, նրա կողքին կանգնելու, նրա հոգսը, տառապանքը և ցավը, նրա երջանկությանը խանգարող վիճակները թեթևացնելու և Հարության լույսը, հույսը և լավատեսությունը մարդկանց հոգիներից և կյանքերից ներս բերելու: Մեզ համար այս իմաստով խորը գոհունակություն է, որ Հարության մեծ այս խորհրդի ներքո տեղի է ունենում Հաբիթաթի տնաշինական 2007 թվականի ծրագիրը, որ կրում է մեր անունը», - նշեց Վեհափառ Հայրապետը:

Նորին Սրբությունն ուրախություն հայտնեց, որ այս ծրագիրն իրականացվում է ոչ միայն հայորդիների, այլև քույր Եկեղեցիների աջակցությամբ: «Մա աստվածահաճո գործ լինելուց զատ նաև միավորում է մեզ՝ տարբեր ազգերի ներկայացուցիչներին, պատասխանատվության զգացումով հանդեպ կարիքավոր մարդը՝ անկախ իր ազգային պատկանելությունից, անկախ իր դավանական համոզմունքներից: Մա գեղեցիկ մի օրինակ է բոլորիս համար և ճանապարհ դեպի մարդկության բարի, պայծառ և ապահով վաղվա օրը, խաղաղ ու երջանիկ օրը», - ասաց Ամենայն Հայոց Հայրապետը՝ իր գնահատանքը հայտնելով ծրագրի բոլոր աջակիցներին, կազմակերպություններին և անհատներին, ովքեր իրենց ներդրումն են բերում ծրագրի հաջող իրագործմանը, ինչպես նաև Հաբիթաթում Հայ Եկեղեցու ներկայացուցիչ Տ. Վիգեն արքեպիսկոպոս Այքազյանին և Հաբիթաթի հետ համագործակցող Տ. Թորգոմ վրդ. Տոնիկյանին:

Արարողությանը ներկա էին տեղական գործընկերներ և հովանավորներ, Միջազգային, Եվրոպական և Հայկական Հաբիթաթի ներկայացուցիչներ, դեսպանատների և միջազգային կազմակերպությունների ներկայացուցիչներ, ԱՄՆ կամավորների խումբը:

ՄԱՅՐ ԱԹՈՌ ՍՈՒՐԲ ԷԶՄԻԱԾԻՆ
ՏԵՂԵԿԱՏՎԱԿԱՆ ՀԱՄԱԿԱՐԳ



«ԿԱՌՈՒՅԵՆ ԴԱՎԱՏՈՎ» ՏՆԱՇԻՆԱԿԱՆ ԾՐԱԳՐԻ ՆԱԴԻՍՈՒԹՅԱՆ ԸՆԹԱՑՔՈՒՄ